

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O DRŽAVLJANSTVU FEDERACIJE BOSNE I HERCEGOVINE**

Sarajevo, juni 2014. godine

PRIJEDLOG ZA DONOŠENJE ZAKONA PO HITNOM POSTUPKU

Parlamentarna skupština Bosne i Hercegovine po hitnoj proceduri donijela je Zakon o izmjenama i dopunama Zakona o državljanstvu Bosne i Hercegovine, koji je objavljen u "Službenom glasniku BiH", broj 87/13 od 11. 11. 2013. godine.

Zakonom o državljanstvu Bosne i Hercegovine uređeno je pitanje sticanja i prestanka državljanstva Bosne i Hercegovine, a Zakonom o državljanstvu Federacije BiH uređeno je pitanje sticanja i prestanka državljanstva Federacije Bosne i Hercegovine.

Zakonom o državljanstvu Bosne i Hercegovine propisano je da entitetski zakoni o državljanstvu trebaju da budu usklađeni i harmonizovani sa tim zakonom.

Zakonom o izmjenama i dopunama Zakona o državljanstvu Bosne i Hercegovine definisana su drukčija rješenja (uvjeti) u pogledu sticanja državljanstva po osnovu naturalizacije te nepostajanja uvjeta za prestanak državljanstva po sili zakona. Prema rješenjima koja su predviđena u navedenom zakonu, postoji obaveza usklađivanja Zakona o državljanstvu Federacije BiH sa tim rješenjima.

Imajući u vidu da se određene odredbe Zakona o izmjenama i dopunama Zakona o državljanstvu Bosne i Hercegovine ne bi mogle primjenjivati prije nego što se izvrši usklađivanje Zakona o državljanstvu Federacije Bosne i Hercegovine sa tim odredbama, smatramo da su ispunjeni uvjeti za donošenje Zakona o državljanstvu Federacije Bosne i Hercegovine po hitnom postupku.

Također, u toku utvrđivanja konačnog teksta Zakona o državljanstvu Federacije BiH sugerisano je od Ministarstva civilnih poslova Bosne i Hercegovine da se predloži donošenje navedenog zakona po hitnom postupku.

ZAKON

O DRŽAVLJANSTVU FEDERACIJE BOSNE I HERCEGOVINE

I - OSNOVNE ODREDBE

Član 1.

(Predmet Zakona)

Ovim zakonom uređuju se uvjeti za sticanje i prestanak državljanstva Federacije Bosne i Hercegovine (u daljnjem tekstu: državljanstvo Federacija), u skladu s Ustavom Bosne i Hercegovine, Ustavom Federacije Bosne i Hercegovine i Zakonom o državljanstvu Bosne i Hercegovine ("Službeni glasnik BiH", br.: 4/97, 13/99, 41/02, 6/03, 14/03, 82/05, 43/09 i 76/09 i 87/13 - u daljnjem tekstu: Zakon o državljanstvu BiH) i druga pitanja koja se odnose na državljanstvo Federacije.

Član 2.

(Državljanstvo Bosne i Hercegovine, odnosno Federacije)

(1) Svi državljani Federacije su samim tim i državljani Bosne i Hercegovine.

(2) Licima kojima prestane državljanstvo Federacije istovremeno prestaje i državljanstvo Bosne i Hercegovine, osim ako ne steknu državljanstvo Republike Srpske.

(3) Licima sa teritorije Federacije kojima prestane državljanstvo Bosne i Hercegovine istovremeno prestaje i državljanstvo Federacije.

Član 3.

(Uživanje prava državljana Federacije)

Svi državljani Federacije uživaju ista ljudska prava i osnovne slobode zagantovane Ustavom Bosne i Hercegovine i Ustavom Federacije Bosne i Hercegovine, kao i zaštitu tih prava na teritoriji Federacije, odnosno na teritoriji Bosne i Hercegovine u skladu s Ustavom Bosne i Hercegovine.

II - STICANJE DRŽAVLJANSTVA FEDERACIJE

Član 4.

(Osnovi za sticanje državljanstva Federacije)

Državljanstvo Federacije stiče se:

- 1) porijeklom;
- 2) rođenjem na teritoriji Federacije;
- 3) prijemom državljanina Republike Srpske u državljanstvo Federacije;
- 4) usvojenjem;
- 5) naturalizacijom;
- 6) međunarodnim sporazumom.

1. Sticanje državljanstva porijeklom

Član 5.

(Uvjeti za sticanje državljanstva Federacije porijeklom)

(1) Dijete rođeno nakon stupanja na snagu Ustava Bosne i Hercegovine stiče državljanstvo Federacije porijeklom:

1) ako su oba roditelja bili državljani Federacije u vrijeme rođenja djeteta, bez obzira na mjesto njegovog rođenja;

2) ako je jedan roditelj bio državljanin Federacije u vrijeme rođenja djeteta, a dijete je rođeno na teritoriju Federacije;

3) ako je jedan roditelj bio državljanin Federacije u vrijeme rođenja djeteta, a dijete je rođeno u inozemstvu, ako bi dijete inače bilo bez državljanstva;

4) ako je dijete rođeno u inozemstvu a u vrijeme rođenja djeteta jedan od roditelja djeteta je bio državljanin Federacije, dok drugi roditelj nije bio državljanin Bosne i Hercegovine, pod uvjetom da do vremena kada navršši 23 godine života podnese prijavu za upis državljanstva Federacije nadležnom organu Federacije, odnosno diplomatsko-konzularnom predstavništvu Bosne i Hercegovine u inozemstvu;

5) ako je dijete rođeno u inozemstvu, a u vrijeme rođenja djeteta jedan od roditelja je bio državljanin Federacije, a drugi roditelj državljanin Republike Srpske, pod uvjetom:

a) da su roditelji saglasni da dijete ima državljanstvo Federacije ili

b) ako nisu saglasni, da je roditelj koji je upisao dijete u matičnu knjigu za evidenciju državljana u diplomatsko-konzularnom predstavništvu Bosne i Hercegovine u inozemstvu u to vrijeme imao državljanstvo Federacije;

6) ako je jedan od roditelja djeteta u vrijeme rođenja djeteta imao državljanstvo Federacije, a drugi roditelj imao državljanstvo Republike Srpske, dijete stiče državljanstvo Federacije ako je rođeno na teritoriji Federacije.

(2) Ako je dijete rođeno u Republici Srpskoj, a u vrijeme rođenja djeteta jedan od roditelja je bio državljanin Federacije, dok drugi roditelj nije bio državljanin Bosne i Hercegovine, dijete stiče državljanstvo Federacije ako su roditelji saglasni da dijete ima to državljanstvo, a ako nisu saglasni, dijete stiče državljanstvo Federacije na zahtjev roditelja koji ima državljanstvo Federacije.

Član 6.

(Sticanje državljanstva Federacije za djecu čiji roditelji imaju državljanstvo Republike Srpske)

(1) Dijete rođeno u inozemstvu, čiji roditelji u trenutku rođenja djeteta imaju državljanstvo Republike Srpske i prebivalište na teritoriji Federacije, stiče državljanstvo Federacije ukoliko su roditelji djeteta s tim saglasni.

(2) Dijete rođeno u inozemstvu čiji je jedan roditelj u trenutku rođenja djeteta imao državljanstvo Republike Srpske i prebivalište na teritoriji Federacije, a drugi roditelj nema državljanstvo Bosne i Hercegovine, stiče državljanstvo Federacije ukoliko su roditelji djeteta s tim saglasni.

2. Sticanje državljanstva rođenjem na teritoriju Federacije

Član 7.

(Sticanje državljanstva po osnovu rođenja ili nalaska djeteta na teritoriji Federacije)

(1) Državljanstvo Federacije stiče dijete koje je rođeno ili nađeno na teritoriji Federacije nakon stupanja na snagu Ustava Bosne i Hercegovine i čija su oba roditelja nepoznata ili nepoznatog državljanstva ili bez državljanstva ili ako je dijete bez državljanstva.

(2) Državljanstvo Federacije stiče dijete rođeno na teritoriji Federacije nakon stupanja na snagu Ustava Bosne i Hercegovine, čiji roditelji u vrijeme rođenja djeteta imaju državljanstvo Bosne i Hercegovine i Republike Srpske i prebivalište na teritoriji Federacije ili na teritoriji Republike Srpske, ukoliko su saglasni da dijete ima državljanstvo Federacije.

(3) Dijete rođeno na teritoriji Federacije čiji jedan roditelj u vrijeme rođenja djeteta ima državljanstvo Republike Srpske, a drugi roditelj nema državljanstvo Bosne i Hercegovine, stiče državljanstvo Federacije ukoliko su roditelji djeteta s tim saglasni.

3. Sticanje državljanstva usvojenjem

Član 8.

(Način sticanja državljanstva Federacije u slučaju usvojenja)

(1) Dijete mlađe od 18 godina života koje ima strano državljanstvo ili je bez državljanstva, a koje je državljanin Federacije usvojio putem potpunog usvojenja, nakon stupanja na snagu Ustava Bosne i Hercegovine, stiče državljanstvo Federacije.

(2) Ako je jedan od usvojlaca državljanin Republike Srpske, a drugi je državljanin Federacije, dijete stiče državljanstvo Federacije ako se o tome slože oba usvojioca, a ukoliko se ne mogu složiti, dijete stiče državljanstvo Federacije ako ima prebivalište na teritoriji Federacije ili ukoliko dijete nema prebivalište na teritoriji Federacije, stiče državljanstvo Federacije ako je usvojlac koji je prijavio dijete državljanin Federacije.

4. Sticanje državljanstva naturalizacijom

Član 9.

*(Uvjeti za sticanje državljanstva
po osnovu naturalizacije)*

(1) Stranac koji je podnio zahtjev za sticanje državljanstva Federacije može steći državljanstvo Federacije naturalizacijom ako ispunjava sljedeće uvjete:

- 1) da je napunio 18 godina života;
- 2) da ima odobren stalni boravak na teritoriji Bosne i Hercegovine najmanje tri godine prije podnošenja zahtjeva, s tim da u momentu podnošenja zahtjeva ima stalni boravak na teritoriji Federacije.
- 3) da dovoljno poznaje pismo i jezik jednog od konstitutivnih naroda Federacije;
- 4) da mu nije izrečena mjera sigurnosti protjerivanja stranca iz Bosne i Hercegovine, odnosno Federacije ili zaštitna mjera udaljavanja stranaca sa teritorije Bosne i Hercegovine, odnosno Federacije od nadležnog organa uspostavljenog Ustavom Bosne i Hercegovine ili Ustavom Federacije Bosne i Hercegovine i da je ova odluka još na snazi;
- 5) da nije osuđivan na izdržavanje kazne zatvora za krivična djela s umišljajem na vrijeme duže od tri godine u vremenu od osam godina prije podnošenja zahtjeva;
- 6) da se odrekne ili da mu na neki drugi način prestane ranije državljanstvo prije sticanja državljanstva Federacije, osim ako bilateralnim sporazumom iz člana 15. ovog zakona nije drugačije predviđeno. Odricanje ili prestanak ranijeg državljanstva na drugi način neće se zahtijevati ako to nije dozvoljeno ili se ne može razumno zahtijevati.
- 7) da se protiv njega ne vodi krivični postupak, osim ako se dokaz o ispunjavanju ovog uvjeta ne može razumno zahtijevati;
- 8) da ne predstavlja prijetnju za sigurnost Bosne i Hercegovine i Federacije;

9) da ima osiguran stalni izvor prihoda u iznosu koji omogućava egzistenciju ili da je u stanju da osigura pouzdan dokaz o finansijskim izvorima za svoje izdržavanje u skladu s odgovarajućim propisom Bosne i Hercegovine;

10) da je izmirio sve poreske ili druge finansijske obaveze u skladu s odgovarajućim propisom Bosne i Hercegovine;

11) da dadne ovjerenu izjavu da prihvata pravni sistem i ustavni poredak Bosne i Hercegovine i Federacije i

12) da ima važeću garanciju o sticanju državljanstva Bosne i Hercegovine i Federacije u skladu s odgovarajućim propisom Bosne i Hercegovine.

(2) Sticanje državljanstva naturalizacijom neće se odobriti čak ako podnosilac zahtjeva ispunjava sve uvjete za naturalizaciju iz stava (1) ovog člana ukoliko postoje osnovani razlozi za sumnju da bi se odobrenjem naturalizacije tom licu ugrozila sigurnost Bosne i Hercegovine i Federacije, te javni red i mir, ili ukoliko naturalizacija nije u skladu s interesima Bosne i Hercegovine i Federacije iz nekog drugog razloga utvrđenog na osnovu cjelokupne procjene činjeničnog stanja podnosioca zahtjeva utvrđenog u postupku.

5. Sticanje državljanstva olakšanom naturalizacijom

Član 10.

(Uvjeti za sticanje državljanstva po osnovu olakšane naturalizacije)

Stranac - bračni partner državljanina Federacije može steći državljanstvo Federacije pod sljedećim uvjetima:

1) da je brak trajao najmanje pet godina prije podnošenja zahtjeva i da još traje u vrijeme podnošenja zahtjeva;

2) da se odrekne ili da na neki drugi zakonom predviđen način prestane njegovo ranije državljanstvo prije sticanja državljanstva Federacije, osim ako to nije drugačije riješeno bilateralnim sporazumom zaključenim između Bosne i Hercegovine i druge države. Odricanje ili prestanak ranijeg državljanstva ne zahtijeva se ako to nije dozvoljeno ili se ne može razumno zahtijevati;

3) da ima odobren stalni boravak na teritoriji Bosne i Hercegovine, s tim da u momentu podnošenja zahtjeva ima stalni boravak na teritoriji Federacije.

4) da ne predstavlja prijetnju po sigurnost Bosne i Hercegovine i Federacije.

Član 11.

(Sticanje državljanstva po osnovu naturalizacije za dijete mlađe od 18 godina života)

(1) Dijete mlađe od 18 godina života ima pravo da stekne državljanstvo Federacije naturalizacijom pod uvjetom:

1) ako su oba roditelja stekla državljanstvo Federacije naturalizacijom ili

2) ako dijete ima odobren privremeni ili stalni boravak na teritoriji Bosne i Hercegovine, s tim da u momentu podnošenja zahtjeva ima privremeni ili stalni boravak na teritoriji Federacije, a jedan je roditelj stekao državljanstvo Federacije naturalizacijom.

(2) Zahtjev za sticanje državljanstva iz stava (1) ovog člana podnosi roditelj djeteta koji ima državljanstvo Federacije.

(3) Ako je dijete navršilo 14 godina života, za sticanje državljanstva Federacije potreban je njegov pismeni pristanak.

Član 12.

(Sticanje državljanstva za lica bez državljanstva i lica koje ima status izbjeglice)

(1) Lice bez državljanstva i lica koje ima status izbjeglice može steći državljanstvo Federacije bez ispunjavanja uvjeta iz člana 9. stav (1) tač.: 2), 3), 6), 9) i 10) ovog zakona samo ako u statusu lica bez državljanstva ili izbjeglice ima neprekidan boravak na teritoriji Bosne i Hercegovine u trajanju od pet godina prije podnošenja zahtjeva, s tim da u momentu podnošenja zahtjeva ima boravak na teritoriji Federacije.

(2) Maloljetno dijete lica koje je steklo državljanstvo Federacije na osnovu stava (1) ovog člana ima pravo da dobije državljanstvo Federacije bez ispunjavanja uvjeta iz člana 9. stav (1) tač.: 1), 2), 3), 6), 9) i 10) ovog zakona ako ima status izbjeglice ili odobren privremeni boravak na teritoriji Bosne i Hercegovine, bez obzira na dužinu boravka, s tim da u momentu podnošenja zahtjeva ima status izbjeglice ili boravak na teritoriji Federacije.

(3) Ako je dijete starije od 14 godina života, potreban je i njegov pismeni pristanak.

Član 13.

(Sticanje državljanstva Federacije emigranata)

(1) Sljedeća lica imaju pravo dobiti državljanstvo Federacije na osnovu zahtjeva bez ispunjavanja uvjeta iz člana 9. stav (1) tač. 1) i 2) ovog zakona i to:

1) emigranti koji su se vratili u Federaciju,

2) prva i druga generacija potomaka emigranata navedenih u tački 1) ovog stava koji su se vratili u Federaciju.

(2) Bračni partner lica iz stava (1) ovog člana ima pravo na sticanje državljanstva Federacije na osnovu zahtjeva, bez ispunjavanja uvjeta iz člana 9. stav (1) tač. 1) i 2) ovog zakona ukoliko ispuni uvjete iz člana 10. tač. 1) i 2) ovog zakona.

(3) U smislu ovog zakona, pod pojmom emigranta smatra se lice koje se iselilo sa teritorije Federacije s namjerom da se stalno nastani u inozemstvu.

Član 14.

(Sticanje državljanstva za lica kojima je državljanstvo prestalo odricanjem ili otpustom)

Lice kojem je državljanstvo Federacije, radi sticanja ili zadržavanja državljanstva druge države, prestalo odricanjem ili otpustom, može podnijeti zahtjev za ponovno sticanje državljanstva Federacije ako ispunjava uvjete iz člana 9. ovog zakona, osim uvjeta iz stava (1) tač. 1) i 2) tog člana, samo ako ima odobren privremeni boravak na teritoriji Bosne i Hercegovine najmanje godinu dana neposredno prije podnošenja zahtjeva ili ima odobren stalni boravak u Bosni i Hercegovini, s tim da u momentu podnošenju zahtjeva ima odobren privremeni ili stalni boravak na teritoriji Federacije.

6. Sticanje državljanstva međunarodnim sporazumom

Član 15.

(Sticanje državljanstva po osnovu međunarodnog sporazuma)

Stranac može steći državljanstvo Federacije putem međunarodnog sporazuma zaključenog između Bosne i Hercegovine i druge države koji je odobrila Parlamentarna skupština Bosne i Hercegovine, u skladu sa članom IV. 4. d) Ustava Bosne i Hercegovine.

III - PRESTANAK DRŽAVLJANSTVA FEDERACIJE

1. Osnovi za prestanak državljanstva

Član 16.

(Osnovi za prestanak državljanstva Federacije)

Državljanstvo Federacije prestaje:

- 1) odricanjem;
- 2) otpustom;
- 3) oduzimanjem;
- 4) međunarodnim sporazumom.

Član 17.

(Uvjeti pod kojima državljanstvo ne može prestati)

Državljanstvo Federacije ne može prestati ako bi lice koje je u pitanju time ostalo bez državljanstva, osim u slučajevima utvrđenim u članu 23. tačka 1) ovog zakona.

2. Prestanak državljanstva odricanjem

Član 18.

(Uvjeti za prestanak državljanstva po osnovu odricanja)

(1) Državljanin Federacije koji je napunio 18 godina života, koji živi u inozemstvu i ima državljanstvo druge države ili mu je zagarantovano sticanje državljanstva druge države, ima pravo da se odrekne državljanstva Federacije.

(2) Djetetu koje živi u inozemstvu i ima državljanstvo druge države ili mu je zagarantovano državljanstvo druge države, prestaje državljanstvo Federacije odricanjem:

- 1) na zahtjev oba roditelja kojima je prestalo državljanstvo Federacije odricanjem, ili
- 2) na zahtjev jednog roditelja kojem je državljanstvo Federacije prestalo odricanjem, uz saglasnost drugog roditelja koji je državljanin Federacije, ili
- 3) na zahtjev jednog roditelja kojemu je državljanstvo Federacije prestalo odricanjem ako je drugi roditelj umro ili mu je oduzeto roditeljsko staranje ili je stranac ili lice bez državljanstva, ili

4) na zahtjev usvojioca kojem je prestalo državljanstvo Federacije odricanjem, a odnos između usvojioca i usvojenog djeteta je odnos potpunog usvojenja.

(3) Ako je dijete iz stava (1) ovog člana starije od 14 godina života, potreban je i njegov pismeni pristanak.

(4) U slučajevima st. (1) i (2) ovog člana, državljanstvo Federacije prestaje licu kada nadležni organ utvrdi da su ispunjeni potrebni uvjeti iz st. (1) i (2) ovog člana i stranci uruči rješenje o prestanku državljanstva Federacije ili kad nadležno diplomatsko-konzularno predstavništvo BiH u inozemstvu rješenje uputi stranci poštom.

Član 19.

(Poništenje odluke (rješenja) o prestanku državljanstva Federacije odricanjem)

Odluka (rješenje) o odricanju bit će poništena na zahtjev lica koje nije steklo državljanstvo države koja mu je izdala garanciju za sticanje državljanstva, o čemu se prilaže odgovarajući dokaz.

3. Prestanak državljanstva otpustom

Član 20.

(Uvjeti za prestanak državljanstva otpustom)

Otpust iz državljanstva Federacije može biti odobren na osnovu zahtjeva lica koje živi na teritoriji Federacije i koje ispunjava sljedeće uvjete:

1) da ima 18 godina života;

2) da protiv tog lica nije pokrenut krivični postupak zbog učinjenog krivičnog djela u skladu sa Krivičnim zakonom Federacije i Krivičnim zakonom Bosne i Hercegovine ili da je osuđeno na kaznu zatvora u Federaciji i da je tu kaznu izdržalo;

3) da je izmirilo sve doprinose, poreze, odnosno druge zakonske obaveze plaćanja utvrđene pravosnažnim odlukama nadležnih organa;

4) da je steklo ili da mu je garantovano sticanje državljanstva druge države.

Član 21.

(Prestanak državljanstva za dijete po osnovu otpusta)

(1) Djetetu mlađem od 18 godina života koje je steklo ili kojem je zagantovano sticanje državljanstva druge države i koje još živi na teritoriji Federacije, prestaje državljanstvo Federacije otpustom, na zahtjev:

1) oba roditelja čije je državljanstvo Federacije prestalo otpustom;

2) jednog roditelja čije je državljanstvo Federacije prestalo otpustom, ako drugi roditelj nije živ, ili mu je oduzeto roditeljsko staranje ili je stranac ili lice bez državljanstva;

3) jednog roditelja koji izvršava roditeljske dužnosti i čije je državljanstvo Federacije prestalo otpustom, a drugi roditelj koji je državljanin Federacije se s tim složi;

4) usvojioca kojem je državljanstvo Federacije prestalo otpustom, a odnos između usvojioca i usvojenog djeteta predstavlja odnos potpunog usvojenja.

(2) U slučajevima iz stava (1) tač.: 1), 2) i 3) ovog člana, ukoliko dijete ima više od 14 godina života, potreban je njegov pismeni pristanak.

Član 22.

(Poništenje rješenja o prestanku državljanstva otpustom)

Rješenje o otpustu iz državljanstva Federacije bit će poništeno na zahtjev stranke ako ta stranka nije stekla strano državljanstvo u roku od jedne godine od dana kada je izgubila državljanstvo otpustom, o čemu se prilaže odgovarajući dokaz.

4. Prestanak državljanstva oduzimanjem

Član 23.

(Uvjeti za oduzimanje državljanstva Federacije)

Državljanstvo Federacije može biti oduzeto u sljedećim slučajevima:

1) ako je državljanstvo Federacije stečeno pomoću prijave, lažnih informacija ili skrivanjem bilo koje relevantne činjenice koja se može odnositi na podnosioca zahtjeva;

2) kad državljanin Federacije obavlja dobrovoljnu službu u inozemnim vojnim snagama uprkos pravnoj zabrani takve službe;

3) kad je državljanstvo Federacije stečeno nakon stupanja na snagu ovog zakona, bez ispunjenja uvjeta iz čl.: 9., 10., 11., 12., 13. i 14. ovog zakona;

4) kada je državljanin osuđen u ili van područja Bosne i Hercegovine pravosnažnom presudom radi preduzimanja radnji kojima se narušava ustavni poredak i sigurnost Bosne i Hercegovine ili kada je osuđen radi članstva u organizaciji koja preduzima takve radnje, pod uvjetom da takve radnje ozbiljno štete vitalnim interesima Bosne i Hercegovine;

5) kada je državljanin osuđen u ili van područja Bosne i Hercegovine pravosnažnom presudom za krivično djelo koje uključuje krijumčarenje vatrenog oružja, eksploziva, radioaktivnog materijala ili narkotičkih sredstava i psihogenih supstanci; ili ilegalni prijevoz i trgovinu materijalima i opremom za proizvodnju oružja ili drugih sredstava masovnog uništenja; ili ilegalni ulazak u Bosnu i Hercegovinu, ostanak ili izlazak iz Bosne i Hercegovine pojedinaca ili grupa; ili organizuje ili učestvuje u trgovini ljudima i krijumčarenju ljudima, pod uvjetom da takve radnje ozbiljno štete vitalnim interesima Bosne i Hercegovine,

6) kada je državljanin osuđen u ili van područja Bosne i Hercegovine pravosnažnom presudom za krivično djelo koje proizlazi iz aktivnosti koje se razlikuju od onih iz tač. 4) i 5) ovog člana, a koje ozbiljno štete vitalnim interesima Bosne i Hercegovine.

5. Prestanak državljanstva međunarodnim sporazumom

Član 24.

(Prestanak državljanstva po osnovu međunarodnog sporazuma)

Državljaninu Federacije može prestati državljanstvo Federacije na osnovu međunarodnog sporazuma zaključenog između Bosne i Hercegovine i druge države koji je odobrila Parlamentarna skupština Bosne i Hercegovine u skladu sa članom IV. 4. d) Ustava Bosne i Hercegovine.

6. Datum prestanka državljanstva Federacije

Član 25.

(Datum prestanka državljanstva Federacije)

(1) Državljanstvo Federacije prestaje otpustom, odricanjem ili oduzimanjem danom dostave rješenja o prestanku državljanstva Federacije licu na koje se rješenje odnosi.

(2) Ako mjesto prebivališta lica iz stava (1) ovog člana nije poznato ili ne može biti utvrđeno, državljanstvo Federacije prestaje danom objave rješenja u „Službenim novinama Federacije BiH“.

IV - PROMJENA ENTITETSKOG DRŽAVLJANSTVA

Član 26.

(Način promjene entitetskog državljanstva)

(1) Državljanin Republike Srpske koji ima prebivalište na teritoriji Federacije stiče državljanstvo Federacije ako to želi i podnese zahtjev za sticanje tog državljanstva.

(2) Državljaninu Federacije koji ima prebivalište u Republici Srpskoj i nakon podnošenja zahtjeva stekne državljanstvo Republike Srpske prestaje državljanstvo Federacije.

Član 27.

(Izbor i sticanje državljanstva Federacije za lica koja imaju prebivalište u Brčko Distriktu BiH)

(1) Državljanin Bosne i Hercegovine koji nema izjavljeno entitetsko državljanstvo, odnosno državljanin Bosne i Hercegovine koji ima državljanstvo Republike Srpske, a koji ima prebivalište u Brčko Distriktu Bosne i Hercegovine (u daljnjem tekstu: Brčko Distrikt BiH), stiče državljanstvo Federacije ako to želi i podnese zahtjev za sticanje tog državljanstva.

(2) Državljanin Federacije koji ima prebivalište u Brčko Distriktu BiH može promijeniti svoje državljanstvo Federacije sticanjem državljanstva Republike Srpske.

(3) Pravo državljanina Bosne i Hercegovine na sticanje, odnosno promjenu entitetskog državljanstva iz st. (1) i (2) ovog člana može se ostvariti samo jednom po osnovu prebivališta u Brčko Distriktu BiH.

(4) Lice koje ima prebivalište u Federaciji kome je činjenica državljanstva Bosne i Hercegovine upisana u matičnu knjigu rođenih ili matičnu knjigu državljana u Brčko Distriktu BiH, a nema izabrano entitetsko državljanstvo, stiče državljanstvo Federacije ako podnese zahtjev za sticanje tog državljanstva.

V - POSTUPAK RJEŠAVANJA DRŽAVLJANSTVA FEDERACIJE

Član 28.

(Organi koji odlučuju o sticanju i prestanku državljanstva)

(1) Državljanstvo Federacije, na osnovu čl.: 5., 6., 7. i 8. ovog zakona, stiče se danom rođenja djeteta, a rješava se prema članu 29. ovog zakona.

(2) Lice stiče državljanstvo Federacije na osnovu čl.: 9., 10., 11., 12., 13., 14. i 15. ovog zakona, kao i u spornim slučajevima iz stava (1) ovog člana, danom donošenja pravosnažnog rješenja nadležnog organa o sticanju državljanstva Federacije.

(3) Federalno ministarstvo unutrašnjih poslova - Federalno ministarstvo unutarnjih poslova (u daljnjem tekstu: Federalno ministarstvo) rješava i donosi rješenja o sticanju državljanstva Federacije iz stava (2) ovog člana, kao i rješenja o prestanku državljanstva Federacije po osnovama utvrđenim u članu 16. ovog zakona, izuzev odluka o odricanju i oduzimanju za koje je nadležno Ministarstvo civilnih poslova BiH, kako je utvrđeno u članu 30. stav (1) Zakona o državljanstvu BiH, te rješenja o državljanstvu za lica iz člana 27. st. (1) i (4) ovog zakona.

(4) Općinska i gradska služba za upravu nadležna za matične knjige rješava zahtjeve za sticanje državljanstva Federacije po stavu (1) ovog člana, kao i naknadni upis državljanstva BiH u matičnu knjigu rođenih predviđeno odgovarajućim propisima o državljanstvu BiH, i vrši upis državljanstva u matičnu knjigu rođenih.

(5) Kantonalno ministarstvo unutrašnjih poslova (u daljnjem tekstu: kantonalno ministarstvo) rješava i donosi rješenja za zahtjeve koji se odnose na sticanje državljanstva Federacije za lica iz člana 26. stav (1) i člana 41. stav (1) Zakona o državljanstvu Federacije za lica rođena i upisana u matičnu knjigu rođenih na teritoriji Republike Srpske koja su na dan 6. 4. 1992. godine, kao i u momentu podnošenja zahtjeva za sticanje državljanstva Federacije, imala prebivalište na teritoriji Federacije.

(6) Državljanstvo lica iz stava (5) ovog člana upisuje se u matičnu knjigu državljana Federacije koja je utvrđena u Zakonu o matičnim knjigama.

(7) Kantonalno ministarstvo je dužno primjerak rješenja iz stava (5) ovog člana dostaviti nadležnom organu Republike Srpske.

(8) Sticanje državljanstva po st. (1) i (2) ovog člana odnosi se i na umrlo lice čije državljanstvo nije upisano u matičnu knjigu rođenih ili knjigu državljana ako ta činjenica predstavlja osnov za ostvarivanje nekog nasljednog ili drugog prava srodnika umrlog lica, što se bliže uređuje propisom iz člana 42. ovog zakona.

(9) U rješavanju zahtjeva za sticanje, prestanak, promjenu i izbor državljanstva Federacije prema ovom zakonu postupa se prema odredbama Zakona o upravnom postupku, osim u slučajevima u kojima je ovim zakonom i podzakonskim propisima donesenim na osnovu ovog zakona drugačije određeno.

Član 29.

(Zahtjevi za upis državljanstva u matičnu knjigu rođenih iz nadležnosti općine i grada)

(1) Zahtjev za sticanje državljanstva Federacije po čl.: 5., 6., 7. i 8. ovog zakona za lica koja žive na teritoriji Federacije podnose se općinskoj i gradskoj službi za matične knjige koja vodi matičnu knjigu rođenih tih lica.

(2) Lica koja žive u inozemstvu zahtjev za upis državljanstva Federacije iz stava (1) ovog člana podnose putem diplomatsko-konzularnog predstavništva Bosne i Hercegovine u inozemstvu.

Član 30.

(Zahtjevi za sticanje i prestanak državljanstva iz nadležnosti Federalnog i kantonalnog ministarstva)

(1) Zahtjev za sticanje državljanstva Federacije iz člana 28. stav (2), odnosno prestanak državljanstva po čl. 20. i 21. ovog zakona, podnosi se kantonalnom ministarstvu prema mjestu prebivališta, odnosno boravišta podnosioca zahtjeva.

(2) Strani državljanin koji u momentu podnošenja zahtjeva za sticanje državljanstva Federacije ima odobren stalni ili privremeni boravak u Federaciji na način predviđen ovim zakonom zahtjev za sticanje državljanstva Federacije podnosi putem nadležnog kantonalnog ministarstva na čijem području podnosilac zahtjeva ima odobren stalni, odnosno privremeni boravak.

(3) Kantonalno ministarstvo dužno je primiti zahtjev iz st. (1) i (2) ovog člana za sticanje, odnosno prestanak državljanstva Federacije i taj zahtjev s potrebnom dokumentacijom odmah, a najkasnije u roku od pet dana od dana prijema zahtjeva, dostaviti Federalnom ministarstvu na rješavanje.

(4) Zahtjev za sticanje i promjenu državljanstva Federacije iz člana 27. st. (1) i (4) ovog zakona podnosi se Federalnom ministarstvu putem nadležnog organa Brčko Distrikta BiH. Zahtjev sadrži izjavu o izboru državljanstva Federacije ili izjavu o promjeni entitetskog državljanstva sticanjem državljanstva Federacije i uz njega se prilaže uvjerenje o državljanstvu Bosne i Hercegovine ili ovjerena kopija putne isprave Bosne i Hercegovine, ovjerena kopija lične karte i potvrda o prebivalištu u Brčko Distriktu BiH.

(5) Ako podnosilac zahtjeva živi u inozemstvu, zahtjev za sticanje, odnosno prestanak državljanstva Federacije podnosi diplomatsko-konzularnom predstavništvu Bosne i Hercegovine, koje taj zahtjev s potrebnom dokumentacijom odmah dostavlja Federalnom ministarstvu na rješavanje.

(6) Zahtjev za sticanje državljanstva prema članu 28. stav (5) ovog zakona podnosi se kantonalnom ministarstvu prema prebivalištu podnosioca zahtjeva, osim u pitanjima za koja je drukčije određeno propisom iz člana 42. ovog zakona.

Član 31.

(Dostavljanje rješenja Ministarstvu civilnih poslova BiH)

(1) Rješenja o sticanju državljanstva Federacije po čl.: 9., 10., 11., 12., 13. i 14., odnosno rješenja o prestanku državljanstva Federacije po čl. 20. i 21. ovog zakona, moraju se dostaviti Ministarstvu civilnih poslova BiH u roku od tri sedmice od dana donošenja rješenja. Ta rješenja stupaju na snagu dva mjeseca nakon što se dostave Ministarstvu civilnih poslova BiH.

(2) Ukoliko Ministarstvo civilnih poslova BiH utvrdi da rješenje iz stava (1) ovog člana nije u skladu sa Zakonom o državljanstvu BiH, predmet se vraća Federalnom ministarstvu na ponovno razmatranje.

(3) Ako nakon ponovnog razmatranja nastane spor između Federalnog ministarstva i Ministarstva civilnih poslova BiH, slučaj se mora odmah uputiti Ustavnom sudu Bosne i Hercegovine na konačnu odluku, u skladu sa članom VI. 3. Ustava Bosne i Hercegovine.

Član 32.

(Rok za rješavanje zahtjeva stranke)

(1) Federalno ministarstvo dužno je riješiti zahtjev stranke za sticanje, odnosno prestanak državljanstva najkasnije u roku od 60 dana od dana prijema zahtjeva.

(2) Rješenje kojim se odbija zahtjev za sticanje, odnosno prestanak državljanstva mora biti obrazloženo.

(3) O zahtjevu iz člana 30. stava (4) ovog zakona odlučuje se u roku iz stava (1) ovog člana i primjerak rješenja u roku od 15 dana dostavlja nadležnom organu Brčko Distrikta BiH, a kada se zahtjev odnosi za promjenu entitetskog državljanstva, rješenje se dostavlja i nadležnom organu Republike Srpske u istom roku.

Član 33.

(Nadležnost organa za odlučivanje po žalbama)

(1) Protiv prvostepenih rješenja općinske i gradske službe za matične knjige i rješenja kantonalnog ministarstva koja se donose u skladu s ovim zakonom može se izjaviti žalba Federalnom ministarstvu u roku od 15 dana od dana prijema rješenja.

(2) Rješenja Federalnog ministarstva iz člana 28. stav (3) ovog zakona i rješenja donesena po žalbi iz stava (1) ovog člana konačna su i protiv njih se ne može izjaviti žalba, ali se može pokrenuti upravni spor pred kantonalnim sudom prema mjestu sjedišta prvostepenog organa.

Član 34.

(Način upisa državljanstva u matičnu knjigu rođenih)

(1) Državljanstvo Federacije upisuje se u matičnu knjigu rođenih bez donošenja posebnog rješenja kada se utvrdi da odnosno lice ispunjava uvjete za sticanje državljanstva Federacije prema čl.: 5., 6. 7. i 8. ovog zakona, kada se upis vrši u okviru osnovnog upisa u matičnu knjigu rođenih u skladu sa propisima o matičnim knjigama.

(2) Kada se državljanstvo Federacije iz stava (1) ovog člana upisuje u matičnu knjigu rođenih poslije zaključenog osnovnog upisa u toj knjizi, taj upis se vrši na osnovu rješenja nadležnog organa.

(3) Državljanstvo Federacije koje se stiče putem naturalizacije i međunarodnim ugovorom (sporazumom), odnosno koje prestaje po članu 16. ovog zakona, upisuje se u matičnu knjigu rođenih na osnovu rješenja nadležnog organa.

Član 35.

(Evidencije državljanstva u općini i gradu)

(1) Evidenciju o državljanstvu Federacije vode nadležne općinske i gradske službe za matične knjige.

(2) Evidenciju iz stava (1) ovog člana čine podaci o državljanstvu upisani u matičnu knjigu rođenih za državljane Federacije koji su upisani u tu matičnu knjigu koja se vodi na teritoriji Federacije, kao i u matičnu knjigu državljana Federacije za državljanstvo lica koja su utvrđena Zakonom o matičnim knjigama, te državljanstvo upisano u knjigu državljana koja se vodila po ranijim propisima o državljanstvu.

Član 36.

(Evidencija u Federalnom ministarstvu)

Evidenciju o licima koja su stekla državljanstvo Federacije u skladu sa čl.: 9., 10., 11., 12., 13., 14. i 15., kao i evidenciju o licima kojima je državljanstvo prestalo u skladu sa čl. 20. i 21. ovog zakona, vodi Federalno ministarstvo u skladu sa propisom iz člana 42. ovog zakona.

VI - DOKAZIVANJE DRŽAVLJANSTVA FEDERACIJE

Član 37.

(Dokaz za državljanstvo Federacije)

Državljanstvo Federacije dokazuje se na osnovu uvjerenja o državljanstvu Federacije.

Član 38.

(Nadležan organ za izdavanje uvjerenja o državljanstvu)

(1) Uvjerenje o državljanstvu Federacije izdaje općinska i gradska služba za matične knjige na sljedeći način:

1) za lica za koja je državljanstvo BiH i Federacije upisano u matičnu knjigu rođenih;

2) za lica čija je činjenica državljanstva upisana u knjige državljana koje su se vodile po ranije važećim propisima na teritoriji Federacije;

3) za lica čije je državljanstvo Federacije upisano u matičnu knjigu državljana Federacije koja je predviđena Zakonom o matičnim knjigama.

(2) U slučaju da nadležni organ iz stava 1. ovog člana bez osnova odbije izdati uvjerenje od državljanstvu, Federalno ministarstvo ili Ministarstvo civilnih poslova BiH izdaje uvjerenje o državljanstvu licu o kojem je riječ na osnovu dokumentovanih podataka koje posjeduje Federalno ministarstvo, odnosno Ministarstvo civilnih poslova BiH u okviru svoje nadležnosti.

(3) U slučaju spora između Federalnog ministarstva i nadležnog tijela Republike Srpske i Ministarstva civilnih poslova BiH, predmet se mora uputiti Ustavnom sudu Bosne i Hercegovine, u skladu sa članom VI. 3. Ustava Bosne i Hercegovine.

(4) Kada je dokumentacija o državljanstvu nedostupna ili državljani Federacije ne mogu pribaviti u razumnom roku, nadležni organ iz stava (3) ovog člana rješenjem će dozvoliti takvim licima da ove podatke pribave na drugi način, uključujući i izjave date od tih lica ili drugih lica.

(5) Federalno ministarstvo će u pojedinačnim slučajevima dostaviti Ministarstvu civilnih poslova BiH tražene informacije iz evidencije koje vode organi iz stava (1) ovog člana.

Član 39.

(Obrazac uvjerenja o državljanstvu)

(1) Uvjerenje o državljanstvu Bosne i Hercegovine izdaje nadležni organ iz člana 38. stav (1) ovog zakona na obrascu koji propiše Ministarstvo civilnih poslova BiH, u skladu sa članom 36. Zakona o državljanstvu BiH, a federalni ministar unutrašnjih poslova propisuje dodatne zaštitne elemente obrasca.

(2) Uvjerenje o državljanstvu BiH sadrži i državljanstvo Federacije.

(3) Izdavanje uvjerenja iz stava (1) ovog člana vrši se na način utvrđen propisima o matičnim knjigama.

VII - NADZOR NAD PROVOĐENJEM OVOG ZAKONA

Član 40.

(Organ nadležan za nadzor provođenja Zakona)

Nadzor nad provođenjem ovog zakona i propisa donesenih na osnovu njega i inspekcijski nadzor vrši Federalno ministarstvo, što se bliže uređuje propisom iz člana 42. stav (1) ovog zakona.

VIII - PRIJELAZNE I ZAVRŠNE ODREDBE

Član 41.

(Sticanje državljanstva Federacije za lica koja su imala prebivalište ili boravište u Bosni i Hercegovini)

(1) Sva lica koja su državljani Bosne i Hercegovine u skladu sa čl.: 37., 40. i 41. Zakona o državljanstvu BiH i koja su na dan 6. april 1992. godine imala prebivalište na teritoriji koja sada pripada Federaciji smatraju se državljanima Federacije, osim ako nemaju prebivalište u Republici Srpskoj.

(2) Sva lica koja su državljani Bosne i Hercegovine u skladu sa čl.: 37., 40. i 41. Zakona o državljanstvu BiH i koja su na dan stupanja na snagu tog zakona (1. januar 1998. godine) živjela u inozemstvu smatraju se državljanima entiteta u kojem su imala prebivalište ili boravište prije 6. aprila 1992. godine, ukoliko se nisu stalno nastanila u drugom entitetu ili izabrala državljanstvo drugog entiteta.

(3) Sva lica koja su bila državljani bivše SFRJ i koja su se u periodu od 6. aprila 1992. godine do dana stupanja na snagu Zakona o državljanstvu BiH (1. januar 1998. godine) stalno nastanila na teritoriji Federacije i koja na toj teritoriji imaju neprekidno prebivalište ili boravište u trajanju od dvije godine nakon stupanja na snagu Zakona o državljanstvu BiH (1. januar 1998. godine), nakon podnošenja zahtjeva dobit će državljanstvo Federacije.

(4) Sva lica koja su bila državljani bivše SFRJ i koja su se u vremenu između dana stupanja na snagu Zakona o državljanstvu BiH (1. januar 1998. i 31. decembra 2000. godine) stalno nastanila na teritoriji Federacije i koja na toj teritoriji budu imala neprekidno prebivalište ili boravište u trajanju od tri godine, nakon podnošenja zahtjeva dobit će državljanstvo Federacije.

(5) Prebivalište djece, u smislu odredaba člana 26. ovog zakona i stava 1. ovog člana, koja su bila maloljetna i nisu imala prijavljeno prebivalište, utvrđuje se na osnovu prebivališta roditelja i drugim dokazima.

Član 42.

(Ovlaštenje za donošenje propisa)

(1) Federalni ministar unutrašnjih poslova donosi propise za provođenje ovog zakona.

(2) Propisi iz stava (1) ovog člana donijet će se u roku od tri mjeseca od stupanja na snagu ovog zakona.

Član 43.

(Način okončanja zahtjeva stranke koji su podneseni do stupanja na snagu ovog zakona)

Zahtjevi stranaka podneseni prije stupanja na snagu ovog zakona koji nisu okončani nastavit će se i okončati prema odredbama onog zakona koji je povoljniji za stranku.

Član 44.

(Datum prestanka Zakona)

Danom stupanja na snagu ovog zakona prestaje da važi Zakon o državljanstvu Federacije Bosne i Hercegovine („Službene novine Federacije BiH“ br.: 43/01, 22/09, 61/09 i 65/11).

Član 45.

(Stupanje na snagu Zakona)

Ovaj zakon stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE

I - USTAVNI OSNOV ZA DONOŠENJE ZAKONA

Ustavni osnov za donošenje Zakona o državljanstvu Federacije Bosne i Hercegovine je sadržan u članu III. 1. b) Ustava Federacije Bosne i Hercegovine, kojim je propisano da su u isključivoj nadležnosti Federacije BiH poslovi državljanstva Federacije, a u vezi sa članom II. A. 5. Ustava Federacije Bosne i Hercegovine, u kojem je određeno da sticanje i prestanak državljanstva Federacije BiH propisuje federalni zakon.

II - RAZLOZI ZA DONOŠENJE ZAKONA

Parlamentarna skupština Bosne i Hercegovine je po hitnoj proceduri donijela je Zakon o izmjenama i dopunama Zakona o državljanstvu Bosne i Hercegovine koji je objavljen u "Službenom glasniku BiH", broj 87 /13 od 11.11.2013. godine.

Zakonom o državljanstvu Bosne i Hercegovine uređeno je pitanje sticanja i prestanka državljanstva Bosne i Hercegovine, a Zakonom o državljanstvu Federacije BiH uređeno je pitanje sticanja i prestanka državljanstva Federacije Bosne i Hercegovine.

Zakonom o državljanstvu Bosne i Hercegovine propisano je da entitetski zakoni o državljanstvu moraju biti usklađeni i harmonizovani sa tim zakonom.

Zakonom o izmjenama i dopunama Zakona o državljanstvu Bosne i Hercegovine definisana su drugačija rješenja (uvjeti) u pogledu sticanja državljanstva po osnovu naturalizacije te nepostojanje kao uvjet prestanka državljanstva po sili zakona. Sa rješenjima koja su predviđena u navedenom Zakonu postoji obaveza usklađivanja Zakona o državljanstvu Federacije BiH sa tim rješenjima, ovo se prije svega odnosi na utvrđivanje uvjeta za sticanje državljanstva Bosne i Hercegovine, odnosno državljanstva Federacije Bosne i Hercegovine.

S obzirom na to da su postojale već tri izmjene i dopune Zakona o državljanstvu Federacije te da bi usklađivanjem sa Zakonom o izmjenama i dopunama Zakona o državljanstvu Bosne i Hercegovine bilo potrebno obuhvatiti više od 25 odredbi Zakona o državljanstvu Federacije, ocijenjeno je da je zbog lakšeg snalaženja i praćenja u njegovoj primjeni prihvatljivije predložiti novi zakon o državljanstvu Federacije BiH. Također, na ovo rješenje iz istih razloga se opredijelilo Ministarstvo lokalne uprave i samouprave Republike Srpske kada je u pitanju donošenje Zakona o državljanstvu Republike Srpske koji treba biti isto usklađen s izmjenama i dopunama Zakona o državljanstvu Bosne i Hercegovine. Donošenje novih entitetskih zakona o državljanstvu je i preporuka Ministarstva civilnih poslova Bosne i Hercegovine.

III - OBRAZLOŽENJE PREDLOŽENIH RJEŠENJA

Prijedlogom zakona o državljanstvu Federacije BiH uređena su pitanja sticanja i prestanka državljanstva Federacije BiH. Sva ova pitanja su definisana i sistematizovana u VIII poglavlju i svako poglavlje reguliše pojedino pitanje u vezi sa sticanjem i prestankom državljanstva Federacije.

U poglavlju I - Osnovne odredbe, čl. od 1. do 3., utvrđen je predmet Zakona te prava koja uživaju državljani Federacije BiH.

U poglavlju II - Sticanje državljanstva Federacije, čl. od 4. do 15., uređena su pitanja: osnovi za sticanje državljanstva Federacije, sticanje državljanstva porijeklom, sticanje državljanstva rođenjem na teritoriji Federacije, sticanje državljanstva usvojenjem, sticanje državljanstva naturalizacijom, sticanje državljanstva olakšanom naturalizacijom i sticanje državljanstva međunarodnim sporazumom.

U poglavlju III - Prestanak državljanstva Federacije, čl. od 16. do 25., uređena su pitanja: osnovi prestanka državljanstva, prestanak državljanstva odricanjem, prestanak državljanstva otpustom, prestanak državljanstva oduzimanjem, prestanak državljanstva međunarodnim sporazumom te datum prestanka državljanstva Federacije.

U poglavlju IV - Promjena entitetskog državljanstva, čl. 26 i 27., regulisana su pitanja: način promjene entitetskog državljanstva te izbor i sticanje državljanstva Federacije za lica koja imaju prebivalište u Brčko Distriktu BiH.

U poglavlju V - Postupak rješavanja državljanstva Federacije, čl. od 28. do 36., uređena su pitanja organa koji odlučuju o sticanju državljanstva, podnošenja zahtjeva za upis državljanstva u matičnu knjigu rođenih, podnošenja zahtjeva za sticanje i prestanak državljanstva, dostavljanja rješenja Ministarstvu civilnih poslova, nadležnost organa za odlučivanje po žalbi i dr. uvjerenja o državljanstvu.

U poglavlju VI - dokazivanje državljanstva Federacije, čl. od 37. do 39., dokaz državljanstva Federacije, nadležan organ za izdavanje uvjerenja o državljanstvu.

U poglavlju VII - Nadzor nad provođenjem zakona, član 40., određen je organ nadležan za provođenje zakona.

U poglavlju VIII - Prijelazne i završne odredbe, čl. od 41. do 45.

IV - FINANSIJSKA SREDSTVA

Za provođenje ovog zakona u budžetu Federacije BiH nije potrebno osigurati dodatna finansijska sredstva.